

四庫全書

史部

欽定四庫全書

欽定續通志卷五百六十五

文苑傳

金一

韓昉

蔡松年

珪

吳激

馬定國

任詢

趙可

郭長倩

蕭永祺

胡礪

王競

楊伯仁

鄭子聃

党懷英

韓昉字公美燕京人仕遼累世通顯昉五歲喪父哭泣盡哀天慶二年進士第一入金累官乾文閣待制知制誥充高麗國信使自天會四年高麗稱藩不進誓表累使皆不得要領昉至其國中徵讀書知古今者商榷辭旨涉旬始置對謂昉曰小國事遼宋無誓表未嘗失藩臣禮今事上國當與同禮昉曰貴國必欲用古禮唐虞三代天子巡狩羣后四朝今天子方西狩

按金史地理志高麗在上

京東南二千餘里金主東巡高麗始在朝會之列西字疑誤 貴國當從朝會其人無

以對乃進誓表如約而還帝聞大悅

按金史原作宗幹大悅今據宏簡錄

改

曰非卿誰能辦此累遷禮部尚書又遷翰林學士兼

太常卿修國史朝廷議禮制度因革咸出其手除濟南尹拜叅知政事封鄆國公俄以儀同三司致仕天德初加開府卒昉善屬文長於詔冊作太祖睿德神功碑當世稱之後高麗使者至必問昉安否

蔡松年字伯堅宋宣和末從父靖守燕山軍敗靖降元

帥府松年辟令史累除真定府判官真定西山羣盜初
平辨居民為賊汙者千餘家得不坐宗弼伐宋松年提
管軍中六部事宋稱臣宗弼入相薦為刑部員外郎皇
統時宗弼當國田穀性方正為宰相韓企先所重松年
與許霖等欲與穀相結穀拒之松年等構以黨事誅穀
海陵前在宗弼軍與松年厚善及即位擢吏部侍郎俄
遷戶部尚書海陵遷中都徙權貨務復鈔引法皆松年
啟之海陵謀伐宋以松年家世仕宋累擢顯位以聳南

人觀聽改吏部尚書尋拜參知政事遷尚書右丞未幾
為左丞封邵國公正隆三年進拜右丞相加儀同三司
封衛國公四年卒海陵悼惜之加封吳國公諡文簡松
年事繼母以孝聞喜周恤親党性豪侈文詞清麗尤工
樂府與吳激齊名時號吳蔡體子珪字正甫中進士第
累官戶部員外郎兼太常丞嘗作兩燕王墓辯據葬制
名物款刻甚詳號為博辨安國軍節度判官高元鼎坐
監臨奸事求援於太常博士田居實大理司直吳長行

吏部主事高震亨等以屬鞫問官御史臺典事李仲柔
仲柔發之辭連及珪笞四十久之除河東北路轉運副
使入為禮部郎中得風病失音除濰州刺史同輩已奏
謝珪獨不能入見乃致仕尋卒珪之文有補正水經五
篇南北史志三十卷續金石遺文跋尾十卷晉陽志十
二卷文集五十五卷

吳激字彥高建州人父拭宋進士終朝奉郎知蘇州激
米芾婿工詩能文字畫俊逸得芾筆意尤精樂府將宋

命至金以知名留不遣命為翰林待制皇統二年出知
深州到官三日卒自號東山有東山集十卷行世

馬定國字子卿荏平人自少志趣不羣宣和末題詩酒
家坐訕訕得罪因以知名劉豫立遊厯下以詩獻豫豫
大悅授監察御史仕至翰林學士嘗作石鼓辯云是字
文周時所造出入傳記引據甚明學者以比蔡珪燕王
墓辯初學詩未有入處夢其父與方寸白筆從是文章
大進有集傳於世

任詢字君謨易州軍市人父貴有才幹善畫喜談兵政
宣間游浙江詢生於虔州為人慷慨多大節書為當時
第一畫亦入妙品王庭筠獨以才具許之登正隆二年
進士歷益都都勾判官北京鹽使致仕優游鄉里家藏
法書名畫數百軸後卒

趙可字獻之高平人貞元二年進士仕至翰林直學士
博學高才卓犖不羈一時詔誥多出其手流輩服其典
雅具歌詩樂府尤工號玉峯散人集

郭長倩字曼卿文登人登皇統六年經義乙科仕至秘書少監兼禮部郎中修起居注與施朋望王無競劉昂老劉無黨相友善所撰石決明傳為時輩所稱有崑崙集行世

蕭永祺字景純遼陽人

從宏簡錄增

本名富里少好學通契

丹大小字廣寧尹耶律固奉詔譯書辟置門下因盡傳其業固卒永祺率門弟子服齊衰喪固作遼史未成永祺繼作上之除太常丞海陵為中京留守特見親禮累

遷翰林學士承旨尚書左丞耶律安禮出守南京海陵
欲以永祺代永祺固辭或問曰公遇知人主以道佐時
何多讓也永祺曰執政繫天下休戚縱欲貪冒榮寵如
蒼生何海陵嘗選廷臣十人備諮訪獨永祺議論寬厚
時稱長者後卒

胡礪字元化磁州武安人少嗜學金人下河北為軍士
所掠至燕亡匿香山寺與傭保雜處韓昉一見異之使
賦詩見志操筆立成昉館置門下使與其子同處教育

之嘗謂人曰胡生才器一日千里他日必名世天會中
舉進士第一累官定州觀察判官督教不倦士子聚居
嘗百數為河朔學校之冠改同知深州軍州事郡守暴
戾蔑視僚屬礪折之以禮守愧服郡事一委之州管五
縣例置弓手胥市井無賴名為迹盜所至擾民礪知其
敝悉罷去歲省民錢五千餘萬遷禮部郎中典禮多所
裁定海陵初拜平章百官賀於朝堂礪獨不跪海陵問
故對曰朝服而跪見君父禮也海陵深器重之及即位

累遷翰林學士改刑部尚書扈從至汴得疾卒

王競字無競彰德人宋宣和中太學兩試合格調屯留主簿入金除大寧令厯寶勝鹽官轉河內令歲饑盜起設方畧以購盡得之沁水泛溢發民築堤豪猾吏為奸者覈實之減費幾半競與前令韓希甫皆有幹能而正平令張元治績差不及民為之諺曰西山至河岸縣官兩人半皇統初因韓昉薦召權應奉翰林文字二年試館閣競文居最遂真授之遷禮部員外郎海陵當國欲

令百官避堂諱競言人臣無公諱遂止蕭仲恭封王欲
援遼故事用紫羅傘競與郎中翟永固言其非竟不行
海陵由是重之天德中累遷禮部侍郎翰林侍講學士
改太常卿同修國史擢禮部尚書大定二年奉遷睿宗
山陵儀注不應典禮削兩階詔改創五龍車兼翰林學
士承旨修國史四年卒競博學能文善草隸工大字兩
都宮殿榜題皆其所書士林推第一云

楊伯仁字安道伯雄弟天性孝友讀書一過成誦登皇

統九年進士以事親不求調天德二年除應奉翰林文
字嘗夜召賦詩未二鼓奏十詠海陵喜又因射烏獻詩
以諷改左拾遺進士呂忠翰廷試已在第一海陵以程
文示伯仁問優劣對曰當在優等海陵曰此今試狀元
也伯仁遂宿諫省俟唱名乃出海陵嘉其慎密世宗時
伯仁又稱孟宗獻發解程文當成大名是歲宗獻府省
廷試皆第一號孟四元時論以為知文為大名少尹郡
中豪民橫恣窮竟渠黨四境帖然獻館陶大辟得其寃

狀人為立祠召入為翰林待制擢禮部侍郎翰林直學
士改吏部侍郎兼侍講伯仁久在翰林文詞典麗帝深
嘉之俄兼太常從幸上京素多病至臨潢感疾還中都
明年卒

鄭子聃字景純大定府人父宏遼金源令二子子京子
聃楊丘行嘗曰金源二子鳳毛也小者尤特達後必名
世天德二年丘行為太子左衛率府率廷試海陵以子
聃文示丘行對曰可入甲乙及拆卷果中甲榜第三調

翼城丞遷贊皇令召為書畫直長子聃頗以才望自負
常慙不得為第一甲第一人正隆二年會試海陵示以
第一人程文子聃少之問作賦對曰甚易因自矜人莫
已若海陵不悅使與翰林修撰楊伯仁宣徽判官張汝
霖應奉天翰林文字李希顏同進士雜試親覽試卷中
第者七十三人子聃果第一海陵奇之除翰林修撰改
侍御史京畿早詔子聃決囚遂澍雨人以比顏真卿世
宗立

從宏簡
錄增

遷待制累遷翰林直學士改吏部侍郎兼

修國史時修海陵實錄帝謂知其詳無如子聃者專以委之大定二十年卒

党懷英字世傑馮翊人宋太尉進十一代孫父純睦泰安軍錄事參軍卒官懷英與母不能歸因家焉大定十年進士累官翰林待制兼同修國史懷英能屬文工篆籀當時稱為第一與鳳翔府治中郝侯充遼史刊修官應奉翰林文字伊喇益趙渢等七人同為編修官凡遼時碑銘墓誌及諸家文集記遼舊字悉上送官時章宗

好文辭旁求文士以備侍從嘗曰近日制詔惟党懷英
最善明昌元年遷國子祭酒三年議開邊防濠塹與同
列十六人請罷其役詔從之遷翰林學士承安二年乞
致仕改泰寧軍節度使明年召為翰林學士承旨泰和
元年增修遼史編修官三員詔為紀志列傳刊修官有
改除者以書自隨久之致仕大安三年卒諡文獻

欽定續通志卷五百六十五

欽定四庫全書

欽定續通志卷五百六十六

文苑傳

金二

趙淵

周昂

王元節

王庭筠

曼慶

劉昂

李經

劉從益

祁

呂中孚

張建

李純甫

王鬱

宋九嘉

李獻能

王若虛

麻九疇

元德明 好問

趙渢字文孺東平人大定二十二年進士仕至禮部郎
中性沖澹學道有所得尤工書自號黃山趙秉文言其
正書體兼顏蘓行草備諸家體其超放又似楊凝式党
懷英小篆李陽冰以來鮮有及者時人以渢配之號党
趙有黃山集行世

周昂字德卿真定人父伯祿字天錫大定進士仕至同
知沁南軍節度使昂孝友喜名節學術醇正文筆高雅

嘗教其甥王若虛曰文章一於外而拙於內者可以驚
四筵而不可以適獨坐可以取口稱而不可以得首肯
又云文章以意為主言語為役今人往往驕其所役至
反役其所主雖極辭語之工而豈文之正哉擢第調南
和簿有異政入拜監察御史路鐸以言事被斥昂送以
詩為人所擠謫東海上十數年始入翰林言事愈切直
大安興兵權六部員外郎從宗室承裕軍失利跳走上
谷衆欲徑歸昂獨不從城陷與其子嗣明同死於難

王元節字子元弘州人祖山甫遼戶部侍郎父誦海陵朝左司員外郎元節家世貴顯而從學甚謹渾源劉撝愛其才俊以女妻之遂傳其賦學登天德三年詞賦進士雅尚節氣不能隨時俯仰久乃遷密州觀察判官既罷即逍遙鄉里以詩酒自娛號遜齋有詩集行世弟元德亦第進士有能名終南京路提刑使

王庭筠字子端河東人大定十六年進士調恩州軍事判官郡民鄒四謀不執事覺逮捕千餘人獨鄒逸去庭

筠以計獲之分別誅誤祇坐預謀者十二人明昌元年
召試館職御史台言其嘗犯贓罪不當以館閣處之遂
罷三年以參政守貞薦召為應奉翰林文字五年帝顧
謂宰執曰應奉王庭筠朕欲以詔誥委之其人才豈易
得近党懷英作長白山冊文殊不工聞文士多妬庭筠
不論其文顧以行止為訾大抵讀書人多口頰昔東漢
之士與宦官分朋固無足怪如唐牛李宋司馬光王安
石均為儒者而互相排毀何耶遂遷庭筠為翰林修撰

承安二年坐趙秉文上書事降鄭州防禦判官泰和元年復起為修撰扈從秋山應制賦詩三十餘首帝甚嘉之明年卒庭筠儀觀秀偉外若簡貴而接人以和少有可取極口稱道雖百負不恨從遊如韓溫甫路元亨張進卿李公度薦引如趙秉文馮璧李純甫皆一時名士世以知人許之為文能道所欲言暮年詩律精嚴七言長篇尤工險韻有藪辨十卷文集四十卷書法學米元章善山水墨竹子曼慶亦能詩并書仕致行省右司郎

中

劉昂字之昂興州人大定十九年進士曾高而下七世
登科昂天資警悟律賦自成一家作詩得晚唐體尤工
絕句為尚書省掾調平涼路轉運副使母憂去職連蹇
十年有薦其才於章宗者自國子司業擢左司郎中會
掌書大中與賈鉉漏言除授事為言者所劾獄辭連昂
帝怒一時聞人如史肅李著王宇宗室從郁皆譴逐昂
降上京留守判官道卒

李經字天英錦州人作詩極刻苦喜出奇語不蹈襲前人李純甫見曰真今世太白也名大震再舉不第拂衣去南渡後其鄉帥有表至朝廷士大夫識之曰此天英筆也朝議以武功就命倅其州後不知所終

劉從益字雲卿渾源人高祖攜天會初詞賦進士從益博學強記精於經學能文章為詩尤工五言大安元年進士累官監察御史坐與當路辨曲直得罪去久之起為葉縣令修學勵俗有古良吏風葉自兵興戶減三之

一田多不毛歲賦七萬石如故從益請於大司農為減
一萬民甚賴之流亡歸者四千餘家未被名百姓乞
留不許入授應奉翰林文字踰月疾卒葉人立石頌德
著有蓬門集子祁字京叔在太學有文名值金末喪亂
作歸潛志以金事修史者多採用焉

呂中孚字信臣冀州南宮人張建字吉甫蒲城人皆有
詩名中孚有清漳集建明昌初授絳州教官召為應奉
翰林文字以老請致仕章宗愛其純素不欲令去授同

知華州防禦使仍賜詩以寵之自號蘭泉有集行世

李純甫字之甫弘州襄陰人祖安上嘗魁西京進士父采卒于益都府治中純甫幼穎悟初業詞賦愛左氏春秋更為經義學擢承安二年進士喜談兵慨然有經世志章宗南征兩上疏勝負多如所料宰執薦入翰林元兵起又上疏論時事不報宣宗遷汴丞相高琪擅威福擢為左司都事純甫審其必敗以母老辭去高琪誅復入翰林連知貢舉正大末坐取人踰新格出倅坊州未

赴改京兆府判官卒於汴純甫晚年喜佛力探其奧義
自類其文凡論性理及關佛老二家者號內稿其餘應
物文字為外稿

王鬱字飛伯大興人儀狀魁竒目光如鶻為文法柳宗
元閎肆竒古動輒數千言歌詩俊逸效李白嘗作王子
小傳以自叙天興初汴京被圍上書言事不報圍稍解
挺身突出為兵士所得其將遇之甚厚鬱徑行無機防
為其下所忌見殺

宋九嘉字飛卿夏津人為人剛直豪邁少游太學有能賦聲長從李純甫讀書為文有奇氣與雷淵李經相伯仲至寧元年進士歷藍田高陵扶風三水四縣令咸以能稱入為翰林應奉正大中以疾去沒于癸巳之難

按金

史此下有龐鑄傳無事蹟可紀亦無著述今刪謹識

李獻能字欽叔河中人先世有為金吾衛上將軍者號李金吾家追獻能以文學名從兄獻卿獻誠從弟獻甫相繼擢第稱四桂李家獻能苦學博覽于文尤長四六

貞祐三年詞賦進士廷試第一宏詞優等授應奉翰林
文字應機敏捷號為得體出為鄜州判觀察官趙秉文
李純甫薦之復入修撰正大末由由鎮南軍節度副使
充河中帥府經歷官元兵破河中奔陝州行省權左右
司郎中值趙三三軍變遇害獻能家故饒財盡于貞佑
之亂在京師無以自資其母素豪奢厚于自奉小不如
意則必訶謫獻能處之自若時以純孝稱之

王若虛字從之棗城人承安二年經義進士歷管城門

山二縣令皆有惠政薦為國史院編修遷應奉翰林文字奉使夏國還轉著作佐郎修章宣二朝實錄成遷平涼府判官入為直學士天興二年崔立變羣小翟奕輩請為建功德碑名若虛為文時奕恃勢作威人或少忤則譏搆立見屠滅若虛謂元好問曰今名作碑不從則死作之則名節掃地不若死之為愈然我姑以理論之乃謂奕輩曰丞相功德碑當指何事奕輩怒曰但言以京城降活生靈百萬非功德乎若虛曰學士代王言功

德碑謂王言可乎且丞相既以城降則朝官皆出其門
自古豈有為主帥頌功德而可信後世哉奕輩不能奪
改名太學生劉祁麻革與好問張信之為之既成以示
若虛共刪定止直叙其事而已後兵入城不果立金亡
微服北歸鎮陽與渾源劉郁東游太山至黃峴峰憩萃
美亭顧謂同游曰汨沒塵中一生不意晚年乃造仙府
誠得終老此生志願畢矣乃令子忠先歸子恕同行因
垂足坐大石上良久瞑目而逝所著文章有慵夫集溥

南遺老集

按劉祈驛潛志載若虛文貴議論有體致不喜出奇下字尤以助詞為首謂史記有失支

隨節處退之原道好文字末云人其人火其書太下字痕蹟黃山谷詩太穿鑿好異溥南遺老集四十五卷辨論居十之九他詩文止數卷亦足見其好尚謹附識

麻九疇字知幾易州人七歲能草書作大字一時目為神童章宗召見問汝入宮殿中懼怯否對曰君臣猶父子也子寧懼父耶帝大奇之南渡後入遂平西山以學古自力博通五經易春秋尤長興定末試開封府詞賦第二經義第一再試南省復然及廷試以誤出士論惜

之正大初門人王說王采苓俱中第帝怪其年幼問之
知常師九疇平章侯摯薦之特賜盧亞榜進士以病未
拜官告歸再授太常寺太祝博士復謝病去去居郾城
天興兵亂挈家走確山為元兵所得驅至廣平病死九
疇初精易學後喜邵堯夫皇極書因學算數兼通卜筮
射覆之術晚更喜醫盡傳張子和學為潤色其所著書
為文精密奇健詩尤工緻明昌以來稱神童者五人太
原常添壽四歲能作詩劉滋劉徽張漢臣後皆無稱獨

九疇能自樹立耆舊如趙秉文以徵君目之而不名

按金

史此下有李汾傳無著述可紀亦無事蹟可稱今刪謹識

元德明太原秀容人自幼嗜書口不言鄙事樂易無畦畛布衣蔬食處之自若家人不敢以生理累之累舉不第放浪山水間卒有東宮集子好問字裕之七歲能詩年十四從陵川郝晉卿學不事舉業淹貫經傳百家六年而業成下太行渡大河為箕山琴台等詩趙秉文見之稱為近代所無興定五年登第累官左司都事轉行

省左司員外郎金亡不仕卒好問為文有繩尺備衆體
其詩奇崛而絕雕剗巧縟而謝綺麗兵後故老皆盡好
問蔚為一代宗工四方碑版銘志盡趨其門所著文章
詩若干卷杜詩學一卷東坡詩雅三卷錦機一卷詩文
自警十卷以金源氏有天下典章法度幾及漢唐史作
已所當任時金國實錄在順天張萬戶家願為撰述既
為樂夔所沮而止乃構亭於家著述其上名曰野史凡
君臣遺言往行采摭所聞有所得輒記錄至百餘萬言

今所傳有中州集及壬辰雜編後纂金史多本其說云

欽定續通志卷五百六十六

欽定四庫全書

欽定續通志卷五百六十七

文苑傳

元

胡長孺

之綱
之純

熊朋來

戴表元

牟應龍

鄭淦孫

陳孚

楊載

楊剛中
李桓

劉詵

龍仁夫
劉岳申

吳師道

陸文圭

陳旅

程文
陳繹曾

李孝光

胡長孺字汲仲婺州永康人其先自天台來徙祖巖起
宋嘉定進士知閩縣事父居仁淳祐進士知台州單州
事文辭政事皆絕出一時至長孺其學益大振咸淳中
外舅徐道隆為四川宣撫參議官長孺從入蜀銓試第
一與高彭李湜梅應春等號南中八士歷任福寧州倅
宋亡退棲永康山至元二十五年下詔求賢有司強起
至京待詔集賢院既而召見內殿拜集賢修撰與宰相
議不合改教授揚州尋移建昌至大元年轉台州路寧

海縣主簿浙東大侵宣慰同知托歡徹爾議行勸貸法
斂富民錢一百五十萬以二十五萬屬長孺藏之長孺
察其有乾沒意悉散之民既而果索錢長孺抱牘進曰
錢在是矣托歡徹爾雖怒不敢問縣有銅巖羣盜狙伺
其門恒出抄為過客患長孺偽衣商人服令蒼頭負貨
以從陰戒騶卒躡其後比至巖中盜果突出皆成擒盡
捕其黨寘之法羣姬聚浮屠巷誦佛書一姬失衣適長
孺出姬訟之命以麥寘羣姬掌中繞誦佛書如初長孺

閉目叩齒曰吾使神監之矣盜衣者行數周麥當芽一
姬屢開掌竊視長孺指縛之還所失衣永嘉民有弟質
珠步搖於兄者兄妻愛之紿言亡於盜屢訟不獲直往
告長孺叱之去未幾治他盜令盜誣兄受步搖為贓逮
至辯甚力長孺曰爾家信有是何謂誣耶兄倉皇曰固
有之乃弟所質者赧持至呼其弟示曰非爾家物乎遂
還之延祐初轉兩浙長山場鹽司丞未上以病辭隱杭
之虎林山以終長孺初師青田余學古學古師邑人王

夢松夢松受學龍泉葉味道味道則朱熹弟子也淵源
既正長孺益行四方旁求旨趣始信涵養主敬為最切
默存靜觀超然自得故為人光明宏偉專務明本心之
學慨然以孟子自許唯恐斯道之失其傳誘引不倦一
時學者宗之嘗言人雖最靈與物同產初無二本聽者
皆躍然興起至有太息者為辭章有精氣非其人雖一
金易一字毅然不與

按輟耕錄云趙孟頫嘗為羅司徒
奉鈔百錠為乃父求墓銘長孺怒

曰我豈為宦官作墓銘者是曰長孺正絕糧其子以情
白坐客咸勸受之長孺却愈堅其送祭如愚歸東陽詩

有云薄糜不繼襖不暖謳吟猶是鍾球鳴鄉闈取士屢誦之曰此余秘密藏中休糧方也謹附識

司文衡貴實賤華文風為之一變晚寓武林病卒所著有瓦缶編南昌集寧海漫抄顏樂齋稿行于世其從兄之綱之純皆以經術文章名之綱字仍仲嘗被薦書其於聲音字畫之說自古獨造其妙惜其書不傳之純字穆仲咸淳進士踐履如古獨行者文允明潔可誦人稱之為三胡云

熊朋來字與可豫章人宋咸淳進士授寶慶府簽書判

官事未上世祖初得江南欲盡求宋遺士而雅重進士以狀元王龍澤為江南行臺御史朋來與龍澤同榜聲名不相下然不肯表襮苟進隱處州里間生徒受學者常百數十人取朱子小學書提其要領以示之學者家傳其書幾遍天下與人譚經義日益不倦會朝廷遣治書侍御史王構銓外選於江西於是參政徐瑛李世安列薦朋來連為福建廬陵教授晚以福清州判官致仕學者稱為天慵先生延祐設科行省爭請為考官朋來

以應試者大半皆及門不赴其後江浙湖廣率卑詞致
禮始往應之及對大廷其所選士居天下三之一焉初
朋來以周禮首薦鄉郡而元制周官不與設科治戴記
者又鮮朋來屢以為言蓋朋來之學諸經中三禮尤深
是以當世言禮樂者咸推宗焉至治中英宗始親祀太
廟銳意制禮作樂學士元明善以朋來薦未及召而卒
有家集三十卷

按元史類編朋來尚有
經說七卷傳未載謹識

戴表元字帥初慶元奉化州人七歲學古詩文多奇語

稍長從里師習詞賦輒棄不肯為咸淳中登進士乙科
閔宋季文氣萎薊而辭骯骯慨然以起衰為已任時四
明王應麟天台舒岳祥並以文學師表一代表元皆從
而受業故其學博而肆其文清深雅潔蓄而始發間事
茅畫而隅角不露東南文章大家必推首焉大德八年
除信州教授再調婺州時年六十餘矣以疾辭其後翰
林集賢復以修撰博士交薦不起尋卒有剡源集行世
牟應龍字伯成其先蜀人後徙吳興祖子才仕宋贈光

祿大夫諡清忠

按虞集墓碑云子才以言事忤時宰鄭清之去國抵吳興寓第而應龍生子才

喜字曰翁歸謹附識

父獻為大理少卿應龍幼警敏為文有渾厚

氣當以任子補京職盡讓諸從弟而自業舉子成咸淳進士時賈似道當國欲邀一見處以高第應龍拒不住及廷對策具言上下情隔國勢危急之狀考官不敢寘上第除光州定城尉應龍曰昔吾祖對策以直言忤史彌遠得洪雅尉今固當爾無愧也沿海制置司辟為屬以疾辭宋亡故相留夢炎事世祖為吏部尚書以書召

之不答已而起家教授溧陽州晚以上元縣主簿致仕
初宋亡時嘯已退不仕一門父子自為師友討論經學
於諸經皆有成說惟五經音攷盛行于世應龍為文長
於叙事時求其文者車轍滿門人擬之眉山蘓氏父子
學者因其所自號稱曰隆山先生泰定元年卒

鄭滌孫字景歐處州人宋景定間進士為禮部郎官至
元三十年有以滌孫名薦者世祖召見授集賢直學士
尋遷侍講學士乞致仕歸弟陶孫字景潛亦宋進士監

西嶽祠先陶孫徵至闕奏對稱旨授翰林國史院編修
官纂修宋史至德祐末年事陶孫曰臣嘗事宋宋是年
亡義不忍書世祖嘉之陞應奉翰林文字後出為江西
儒學提舉淦孫兄弟在當時最號博洽士大夫翕然推
重淦孫所著有大易法象通贊周易記玩等書陶孫有
文集若干卷

陳孚字剛中台州臨海人至元中以布衣上大一統賦
江浙行省聞于朝署上蔡書院山長考滿謁選京師世

祖命尚書梁曾使安南選南士為介朝臣薦孚博學有
氣節授翰林國史院編修官為曾副至安南世子陳日
燾以憂制不郊迎又不令由中門入曾致書詰責往復
再三辭直氣壯皆孚筆也其所贈孚悉却之詳見梁曾
傳使還除翰林待制帝方欲寘之要地而廷臣以孚南
人且尚氣頗嫉之調建德路治中再遷衢州所至多著
善政秩滿請典鄉郡復授台州路治中大德七年奉使
宣撫循行諸道時台州旱民饑道殣相望浙東元帥托

歡徹爾以省檄賑濟怙勢立威乎愬其不法蠹民事宣
撫使按實坐其罪亟命發倉賑救民賴全活者衆而孚
亦以此致疾卒於家享年天材過人性任俠不羈為詩文
任意即成不事雕斲有文集行世

按台州府志云贈臨海郡公諡文惠有大

游觀光玉堂交州桐江柯山等稿謹識

楊載字仲弘其先居建之浦城後徙於杭少孤博涉羣
書年四十不仕戶部賈國英數薦於朝以布衣召入為
翰林國史院編修官與修武宗實錄延祐初仁宗以科

目取士載首應詔登進士第歷仕寧國路推官初趙孟頫在翰林得載所為文極加推重由是名動京師其文章一以氣為主博而敏直而不肆尤以詩名家嘗語學者曰詩當取材漢魏而音節則以唐為宗自其詩出一洗宋季之陋同時有楊剛中字志行上元人為文奇奧簡澁動法古人不屑為世俗平凡語元明善極歎異之仕至翰林待制有霜月集行世其甥李桓字晉仲同郡人由鄉貢進士累遷江浙儒學副提舉亦以文鳴江東

載與剛中同輩行而桓則稍後云

劉詵字桂翁吉安廬陵人

按歐陽玄墓碑云其先自清江之翟斜徙居吉水之南嶺

謹附 識 幼失父知自樹立既冠重厚醇雅素以師道自居

教學者有法聲譽日隆江南行臺累以遺逸薦不就為
文根抵六經躡躒諸子百家融液今古而不露其踔厲
風發之狀四方求詩文者日至其門所著有桂隱集至
正十年卒同郡龍仁大字觀復劉岳申字高仲皆與詵
齊名而仁夫之文尤奇逸流麗所注周易多發前儒之

所未發用薦者以岳申為遼陽儒學副提舉仁夫為江浙儒學副提舉皆不就

吳師道字正傳婺州蘭溪人自羈州即善記覽工詞章才思涌溢弱冠讀宋儒真德秀遺書幡然有志為己之學嘗以持敬致知之說質於同郡許謙謙復之以理一分殊之旨由是造詣益深大旨在發揮義理而以闢異端為先務登至治元年進士第授高郵縣丞調寧國路錄事遷池州建德縣尹所至有治聲中書左丞呂思誠

侍御史孔思立薦之朝召為國子助教尋遷博士其教
一本朱熹之旨而遵許衡之成法六館諸生咸自以為
得師以禮部郎中致仕終於家所著有易詩書雜說春
秋胡傳附辨戰國策校註敬鄉錄及文集二十卷

陸文圭字子方江陰人幼穎悟博通經史百家宋咸淳
初以春秋中鄉選宋亡隱居城東學者稱曰牆東先生
延祐設科有司強之就試凡一再中鄉舉為文融會經
傳縱橫變化莫測其涯際東南學者皆宗師之朝廷數

遣使馳聘以老疾不果行卒文圭性高邁以奇氣自負
於地理考覈尤詳凡天下郡縣沿革人物土產悉能默
記如指諸掌先屬續一日語門人曰以數考之吾州二
十年後必被兵吾死當葬不食之地勿封勿樹使人不
知吾墓所在庶無暴骨之患其後江陰亂冢盡發人服
其先知有牆東類稿二十卷同里梁益字友直博洽經
史工文辭其教人以變化氣質為先學徒不遠千里從
之自文圭既卒浙西稱學術醇正者惟益而已所著書

有三山稿詩緒餘史傳姓氏纂又有詩傳旁通深得朱子之學後卒

陳旅字衆仲興化莆田人資稟穎異稍長至溫陵從鄉先生傅古直游聲名日著以薦為閩海儒學官御史中丞馬祖常使泉南一見奇之因勉遊京師虞集見其文慨然曰此所謂我老將休付子斯文者矣即延至館中朝夕相講習自謂得友平章趙世延力薦之除國子助教居三年考滿諸生不忍其去請再任馬元統二年出

為江浙儒學副提舉至元四年入為應奉翰林文字至
正元年遷國子監丞又二年卒旅於文自先秦以來至
唐宋諸大家無所不究故其文典雅峻潔必求合於古
作者有文集十四卷

按書史會要云旅善古隸而行楷亦有法謹附識

旅感集

為知己其在浙江時集歸田已數載歲且大比請於行
省參政富珠哩卅親奉書幣請集主文鄉闈欲為問候
計衝冒炎暑千里至臨川集感其來留旬日而別惓惓
以斯文相勉既而聞旅卒深痛悼之同時有程文陳繹

曾皆名士文字以文徽州人仕至禮部員外郎作文明

潔而精深集亦多稱之

按一統志云自號黟南生
有文集三十八卷謹附識

曾字伯敷處州人為人雖口吃而精敏異常諸經注疏多

能成誦文辭汪洋浩博其氣淳如官國子助教

按書史會要云

釋曾學識優博真草篆隸俱通習得法謹附識


論者謂二人皆與旅相伯仲云

李孝光字季和溫州樂清人少博學篤志復古隱居雁

蕩山四方之士遠來受學至正七年詔徵隱士以秘書

監著作郎召赴京師見帝於宣文閣進孝經圖說順帝

大悅明年授祕書監丞卒於官孝光以文章負名當世
其文一取法古人非先秦兩漢語弗以措辭有文集二
十卷雁山十記一卷



欽定續通志卷五百六十七